

## NOTIZIE PER LA STAMPA

----- 8 ottobre 2015

### **La tragjediè furlane tal prin an de Grande Vuere Mostre multimediâl inte glesie di Sant Antoni fin ai 6 di Dicembar**

Daspò Aquilee, Ruvigne e Tarcint, si ferme a Udin (glesie di Sant Antoni Abât), il percors multimediâl “1914-15. La Vuere di chei altris e i furlans”, il progjet metût sù de Provincie di Udin sul teme dal prin conflit mondiâl. Iniziative che e trate, in particolâr, la cundizion sociâl e politiche de popolazion civîl dal Friûl intal 1914 e tal 1915 cuant che il conflit al cjape dentri ducj.

Il percors multimediâl si svilupe midiant di un incrosament di imagjinis, peraulis e videos che al met in vore une schirie di postazions dulà che il visitadôr si cjatarà leteralmentri traspuartât tai lûcs e tes situazions dai events descrits; al jentre tal cûr de storie incuintrant personaçs e int di ogni dì, interagjint cu lis secuencis videos fatis di pueste.

Il percors al darà la pussibilitât di meti dongje traviers di tassei semantics, visîfs e sonôrs un mosaic storic e emozionâl de tragjediè furlane intal prin an de Grande Vuere. In ocasion dal tai de curdele di scree, il president de Provincie di Udin Pietro Fontanini al à fevelât de impuartance dal percors espositîf e de gnove oportunitât di aprofondiment e cognossince dade fûr par tignî vive la memorie di events che a segnarin la storie des nestrîs tieris; la assessore provinciâl ae Culture Francesca Musto e à ricuardât lis carateristichis dal percors progjetuâl nassût dentri di un partenariât tra Provincie di Udin, (prime de file), il Museu archeologjic nazionâl di Aquilee, la Associazion culturâl Naiè e la Academie udinese di Sience, Letaris e Arts, sostignût de Regjon FVG tra lis dîs iniziativis celebrativis pai 100 agns de Grande Vuere fatis jentrâ tal finanziament.

Svilupade dal storic Enrico Folisi cu la preparazion fate dal architet Massimo Bortolotti, la mostre e scandaie aspiets inmò pôcs aprofondîts de storiografie sul prin conflit mondiâl, analizant ancje la funzion dai mieçs di informazion. La mostre si pues visitâ fintremai ai 6 di Dicembar (10-12.30 e 16.30-19, ingrès a gratis, lunis sierade). La tape de mostre intal cjâf lûc e je stade sostignude de Fondazion Crup (a la inaugurazion si è dât dongje Federico Vicario tant che component dal orghin de direzion) inte otiche di secondâ lis visitis des scueladis. Al tai de curdele pal Comun di Udin al jere presint il vicesindic Carlo Giacomello.